



**BENVIGNÛTS**

**AE GNOVE**

**CONTECURTE!**

Sì! Lu savìn... come che o podês viodi sot di chest post al è za di cualchi dì che o sin daûr a traficâ e cualchi tai a lu vin za servît. Un piçul licôf dulà che o vin invidât i vielis contecurtârs, ancje se nus pâr di vêju aromai pierdûts par strade...

Ma vuê e je la zornade de vierzidure uficiâl, dulà che o sperìn di tirâ dongje sedi chei che nus corevin daûr prin, sedi e soledut cualchidun di gnûf, passionât di **lenghe furlane e di narative curte**.

Cussì nus pâr just, prin di dut, di **dôs peraulis par chei che a capitin in cheste Ostarie pe prime volte**.

Ce robe ise? Si domandaràn... O miôr, disìn nô, **ce ise diventade?**

Sì, parcé cheste Ostarie, par chel che al segue il blog vieri, o par chel che al va a dâi un cuc cumò, e jere za vonde ben inviade, ma vûstu che il paron di cjase (splinder) nus butâve par aiar il locâl une dì sì e une ancje, vûstu parcè che o vevin voie di miôrâ il servizi e la ufierte, o vin pensât ben di trasferîsi achì, su chest lûc virtuâl che o stês leint cumò.

E alore, si diseve, ce sino diventâts?

Nissune pôre! **Il teme di fonde al è e al reste la Conte Curte**, come che podês viodi de

insegne, che no je cambiade. Dome che o vin inressât sedi l'organic, sedi la ufierte, diventant, di fat, une piçule redazion.

A gjestî la barache al reste l'Ustîr, *Raffaele*, che al è chel che par solit us rispuint ae direzion di pueste e al matee cun voaltris cuant che a nus mandâs lis **Contis**.

Subit in bande, che si ocupe di **Gnovis** e dal rapuart cu lis **Partidis di Discors** che a saltin fûr de nestre intese cu La Patrie dal Friûl, o vin l'Ustîr in Seconde, il *Dree*. In zonte a cheste ufiarte o vin di gnûf il nestri Camarîr, *Sandri*, che nus inscuelarà cun pirulis di **Lenghe Furlane**, e un gnûf acuiist, *Gianfranco*, che al lavore daûr, come garzon, ma za cun miercûs o vedarês ce che al è bon di ufrînus, cu la sô **Conte Misteriose**. No je finide, parcè cualchi volte, judâts dal nestri Famei, *Checo*, o quartin ancje ator lis **contis pal mont reâl**, cun **Events e Leturis**, come che o vin za començât a fâ intal Vagon Gnot.

No us pâar avonde?

No dome chest, alore, parcè o vin ancje altri, in cheste Ostarie Leterarie furlane. O tirarin fûr, ogni tant, cualchi conte de **Ostarie Viere**, che in ogni câs no je dismetude, ma nus covente ancjemò di cantine, par tignî il vin a invecjà ben. O invidarin cualchi **Forest in Ostarie**, par viodi cemût che a salte fûr cualchi Conte Curte voltade inte nestre lenghe. O cirarin ancje, se o rivin, di dâus cualchi **Ispirazion**, come chês par la gnot de vilie dai Sants, par viodi di stiçâ chei che a scrivin, a tirâ fûr cualchi conte che e ziri ator des 2000 batudis, che al reste il nestri limit di lungjece.

Isal dut?

Disaressin di sî... No vin voie di contâusale masse lungje!

Se il nestri gnûf progjet us interesse o podês lei plui in detai **il manifest e lis nestris ideis di fonde**.

E cumò ce nus coventie?

Semplic: **nus coventin letôrs e scritôrs**, passionâts di contis curtis, lenghe furlane e narrative in gjenerâl.

Se ce che o vês denant dai voi cumò us plâs, diseitnusal fracant il cuadretut achì sot, o lassantnus un coment, sparniçait cheste gnove e invidait cui che o pensais che al sedi interessât, coreitnus daûr sul muselibri o diventait nestris letôrs di google come che us dîs la colonute a man çampe, dulà che adalt, o cjatais la nestre direzion di pueste.

Us spietin ducj, e ancjemò une volte, **BENVIGNÛTS!**